

張文襄公詩集

張文襄公全集卷三百二十六

詩集三

門人諸孝廉

可寶

爲余畫楚游十三圖今失去更

求畫手補之各題一詩

黃鵠磯

武昌雄劇勝荊州混合江湘接漢流
鷗鷺都忘爭戰事一樽明月坐西樓

琴臺

漫嗟孤調闕朱絲當世遺音後世知
梅子山青湖水白良宵可有撫絃時

武昌西山

前帶平江後枕湖山林葱蒨舊吳都西龕北拒喧騰過
草棘尋幽到二蘇

樊口

石瘦江清曲港長窪尊突兀近漁莊今人亦有聲牙性
願結邨居伴漫郎

雪堂

乞得營田自墾荒數椽聊禦北風涼仙翁去後英雄住
占斷江山是此堂

胡文忠公駐軍黃州葺雪堂駐之

鹿門

拜床難訪德公廬白髮詩人作隱居欲濟無舟牢落意

槎頭秋水釣鰌魚

習家池

隄上曾無女似花
天寒魚鳥數雲沙
里中冠蓋銷沈盡
尚有荒池號習家

隆中

健婦蒸藜兒課耕
諸賢朋好又親情
休論魚水雲龍事
已足山居了一生

蘭臺

在安陸府城內

漢水如環繞郢都
山川秀朗楚中無
侍臣朝暮陪遊讌
成就清才宋大夫

龍山

山上有寺余宿此一夕

司馬豪情幕府賢
霜風落帽賞秋天
龍山剩有枯僧寺
夜雨留人講鈍禪

蝦蟆碚

案諸遲菊畫冊有歌羅驛無蝦蟆碚

蝦蟆碚下水泉清
遷客爭題洞口名
謫到夷陵眞善地
豈惟橘茗敵東京

空舸峽

疊巘陰深插虎牙
猿猱行處見人家
秋煙搖盡巴人櫓
一夜灘歌兩鬢華

行峽江皆蜀船櫂歌最哀

蒙泉

在荆門州

循嶺清泉泐泐鳴使君講學數遊行塵車獨戀虛堂宿
默坐苔磯自濯纓

秋興

歸鴻警邊吹離羊嘶商音夷則傷萬物肅然惻我心夕
溽砌菊露晨損庭柯森元蟬閱曼響蜻蛚振促吟虛堂
紉緗素珍此一寸陰隕落悚困學澄顙愉煩襟蹇衣覽
城闕披露西山岑涼宇絳竦斂頽照碧氛沈登稼農休
耒授衣女急鍼荒陂稍夷曠葭亂猶蕭慘此日歎竭澤
昔游鑒清湛潘生賦不達漢武樂已淫玩易自無悶歌
唐獨思深欲辯誰爲質命殘聊孤斟游息止義圃翔集

張文林誰云秋可悲且操履霜琴

扈從上 定東陵作

孝貞顯
皇后陵名

蒼梧雲已遠娥臺景忽傾同歸瞻鼎湖遐征辭鳳城六
龍爲躑躅萬騎咸悲鳴引綽黯天容啟輶摧皇情恭維
配天日德邁楚樊貞教禮彤管煒廣恩樛木縈曳練旣
垂戒脫珥亦流聲板蕩屬危疑負展資神明並尊觀嫺
簡同德逾皇英賢才卷耳詠和氣女媧笙良由好道德
終見告武成西眷慈嶺靜東瞻瀛洲平保沖奠兩代付
託完八紘天步已清晏聖善功莫京重紆聽卑訪祇益
受寵驚絳灌葩殊遇終賈非爲名撮壤亦何裨負乘徒

殫精璇魄有薄蝕秋霜忽淒清追思燕羽勗莫阻鸞驂
迎仙桃弇山渺儀樹薊煙橫幽宮闕億載雨泣號編氓
風撼羣松哀日照孤藿誠小臣蒙蔭育何用惜餘生

同張繩菴訪僧心泉因與同遊南洼

簪組如林森機械拙者轉喉招嗔怪辛苦酬答兩無益
適野尋僧差足快清遠無如龍樹閣風水鱗鱗漾蒲稗
白日閒澹罕遊人午鳩獨鳴寂梵唄三人不知誰主客
錯綜談端如鍼芥會心卽答倦卽默茗椀無溫聊一啜
此際機軸盡擺脫何異枯柳指馬疥禪客灑落不參禪
偶參金石及書畫遠識阮儀徵姚伯昂近戴鹿牀劉燕

庭略述舊聞資感喟海寧達受號博古法眼炯炯同宗
派縹囊犀軸積如倉投老盡償柴米債此亦五陰障真
如今朝始入四禪界文暢愛文心無著如滿遊山力未
憊我雖鈍根可漸磨師老難迴年齒邁留此孤雲伴我
遊灑然何知世網隘

族姪瑞蔭入學與其父子青宮相同歲賦詩爲賀一首
高山鉅谷虎龍蟠合有蘭芽玉挺妍剛數祥齡周綺甲
已欣故物得青氈傳家灝固汾陰榜華國韋平漢史編
我愧穎濱羈海曲和詩喜得小斜川

嶄然頭角不尋常南阮西裴與有光豈羨文辭比較馬

好爲公相致堯湯父風清約留茶器門第高華戒紫囊
六十年來重秉節佳談更繼北平黃

黃侍郎叔琳與其子總憲登賢先後

同科成

進士

憶蜀遊十一首

浣花溪

乾隆下詔訪蜀故禮壁石室均渺茫君平卜肆更無考
趙錄樂記烏能詳獨有城西浣花宅至今門前溪水香
經術道德皆寂滅世人所愛徒文章文章小技胡能爾
顛倒百代籠三唐此老落筆與眾異憂國愛主出肝腸
胡羯恣睢蕃回闕收京問寢無時忘敦本好賢念故舊

臧獲雖蟲皆恐傷乞錢辛苦作草閣苟完豈能免淒涼

今日朱甍映淥水滿徑竹露一作竹露滿徑園花光身居兩載

甚倉卒栖神獨與江山長豈是詩筆吐光燄實惟忠篤

通穹蒼卽論愛文亦美俗巖穴老生皆激昂鄙哉大橋

題駟馬徒以富貴驕其鄉今成都北十里有駟馬橋

劍閣

物苟有可欲徒自錮南山敵國貪吾土地利難防閑瀛

海不能阻奚論山蹊閒劍門若石城猿鳥愁躋攀五丁

迎秦使納敵召禍患艾越彬亦入重扇失其艱平世成

夷塗戍卒稀且閒陰壑秋雨積馬羸憂石頑巖樹覆深

澗微聞鳴潺潺慷慨發勞歌誰爲賦縣蠻陸銘不可求
峭壁惟苔斑李唐恃三窟乘輿四往還宋眞逮金哀學
步何其孱天子守四夷豈在保一關

錦屏山

嘉陵一江勝處在閬州閬州城南號稱五城十二樓明
鏡三面抱城郭錦屏九疊臨汀洲江深石潤樹蔥蒨帝
子飛蓋時來游峭壁下瞰鼉鼉動危磴上見猿猱休山
顛地勢轉夷曠翹足卧看澄江流當年丹梯碧瓦照山
谷今日石稜磊磊成荒邱時見樵牧語煙靄無復士女
嬉春秋杜歌清壯猶可誦馮記荒渺誰能搜唐代親藩

多典郡曹臯最著他無儔好治宮室恣游讌猶勝虐下
藏奸謀吾聞洪州高閣亦是滕王建飛雲捲雨今仍留
我勸蜀人惜名勝荒葳勿使山靈羞

凌雲山

李冰弱水性雙流分離堆醺爲千陂塘澶漫生文漪合
爲一巨瀆頓異濫觴時嘉州江始縱如鯨揚其鬚青衣
自西注高浪無雄雌靈巖爲幟志岸然臨其歧石色閒
黝赤藤蒙樹倒垂摩頂高且平廣譙可張施手持一卮
酒下視千帆馳三峩晃翠黛晴明或見之曠欲游鴻濛
豪欲挈地維如去肝鬲病宿痞吐無遺磬山鑿化人脩

腹手如箕道是南康王造象福氓蚩皋才雖文武暴侈
驚華夷留此鉅偉觀差足駭蛟螭山川數雄駿吾謂蜀
之魁蘇歌固跌宕未盡山川奇願召名士游一洗寒酸
詩

重慶府

江與孫水會漢嘉南下敘州會金沙瀘州南會黔瀘水
都邑逐漸成繁華重慶北會西漢入壯盛灝漾遂無涯
楚加不義陵中國秦并六王成一家名城危踞層巖上
鴈鷗視雄三巴巴人能文兼好武深山今已無長蛇
唐人分鎮昧形勢梓州亦建東川牙吳晝嘉陵不盡入

江處丹青雖妙奚足誇荆湖東控關門戶子午北嚮通
幽遐東風連檣來估舶春雲被野蕃桑麻橘官鹽井并
充阜萬機織錦翻朝霞產巴緞今更織爲方文錦請歌巴曲教渝舞
夜夜醉看巴江花

忠州東坡

川東山水會忠州最清妍巴峻夔陜隘適處巴夔間唐
代猶僻陋謫官類多賢前有李與陸後有白樂天旣少
冠蓋客復無歌舞筵民貧吏亦魯弄筆圖不遣野步得
東坡聊寄桑者閑我來江上望花竹籠春烟萬畝同一
綠茱萸開秧田江平碧瑟瑟山遠青娟娟刺史甚安樂

廚傳頗充然不望遷三秩但願居十年竊笑古人常有
遷謫意雖有山水戚戚無歡顏今忠州爲四川善地余按試時同鄉侯菊坡知此州先調省年餘回任甚喜

摩圍閣

在黔江郁山鎮

蒼蒼摩圍山猶染唐時色

白樂天詩摩圍山色正蒼蒼

此是入黔道

蠻山逞巔劣太虛失清曠遭此羣峭逼往者李供奉後
來黃魯直山閣井觀天遷客來游息其下有丹井泠泠
我心惻宜州寄城樓羨此安可得黃詩多槎牙吐語無
平直三反信難曉讀之鯁胸臆如佩玉瓊琚舍車行荆
棘又如佳茶薺可啜不可食子瞻與齊名坦蕩殊雕飾

枉受黨人禍無通但有塞差幸身後昌德壽摹妙墨注
詩獲任淵亦得謫蜀力南浦題名存山鬼護石刻

邛崃山九折坂

今名大相公嶺小相公嶺土人謂以武侯得名恐非疑是韋南

康李贊
皇耳

漢家愛金碧遠通西南徼至今兩物蕃貢市來六詔自
從唐蒙後叱馭猶震掉熙朝文軫恢越舊供庸調匏壺
鬼教廢花鬘菩薩妙不憂瀘水毒奚畏邛崃峭嵐氣造
陰晦燭龍鄙不照不見山首尾高度詎能料巨有旄牛
迹悽無杜鵑叫閔茲役夫病胸慄捧輿轎明發昏未休
百盤困旋繞茅舍喜一飯溼衣就烘燎谷鳴致霧涌搖

手戒呼嘯兩日升嶺脊西見雪山耀直北走松維廵南
包蠻驃積素鬪朝日日懾身飄搖大嶺最廣博小嶺亦
宵窹熟戶解迎拜生番或攻剽蜀境接藏衛法王受徵
召業業者闔峒冠蓋久焜耀何況益部內豈蹈回車誚
寧遠有銅官誅求吏不肖蜀帥無遠略黃龍失信約葛
侯收南中豈曰非治要

夔門

導河鑿三門導江止一門赤甲高刺天瑤姬司其閤自
入湍氏道驟如萬馬奔嘯喻恃一壑鯁咽不能吞灩澦
抗其閒虎豹當關蹲濫穴走鯢桓聯臂戰狻猊何人立

高編指麾灘師尊哀歌助羣楫犯難穿天根臍入汨復
出觀者失其魂霜清秋潦降寒見東西屯率挽費百丈
峻壁寒可捫天建華陽國人力挾其焚昔日麻鹽通今
日集諸蕃從來多險國不得如圈豚攻者成霸王守者
難自存流梯破吳都井蛙蹙公孫八陣已破碎日落巫
雲昏

火井

閉關一無求善國莫如蜀大利歸鹽筴不薪火自足富
媼吐靈怪光向絳霄燭一邀葛相窺再昌炎漢錄當其
穿鑿始頑堅百丈劖萬竈恣煎烹天饜程鄭欲卻咽巴

婦井丹沙細如粟神愁地脉洩人畏劫灰促蜀產洵夥

頤更僕難盡錄錦江夏絲白蒙頂春茶綠陰木堅勝鐵

樹蠟潔如玉卮茜今衰歇糖霜復繼續順慶紅花之利今為洋紅所奪

自黃山谷居叙州始造糖霜著糖霜譜今為出洋土貨大宗銅鐵饒坑冶但患無人

督馬牛充耕戰藥物兼良毒憶昔南宋季一鎮支全局

緡錢三千萬供軍踵相屬南宋時蜀中財賦解三司者三百餘萬緡蜀中自用者三

千餘萬緡固由地產穰亦恐征斂酷保民有至道君子善處

沃

青城山在灌縣余季父曾知灌縣久聞其勝今提蜀學報滿遂欲往遊聞有司將具供

張乃止

五嶽之外孰可遊山荒樹伐憐羅浮雁岩石好病瘦狹
黃山雲好嫌陰幽匡廬外博中枯寂但誇簾谷懸飛流
只有青城不可唾深秀能使人淹留巖壑回互三十里
青蒼不落無春秋層巒簇簇散花竹長坂往往開田疇
隨處澗泉堪濯足登攀不爲芒屨愁千家百寺資用廣
薪蔬何待出山求欲界仙都此儻是縱留一月豈能周
古有避世姚平仲今無好事何東洲何子貞由四川提學罷官後曾往遊
茲山十載入夢寐已辦笠屐窮探搜或云行部古不到
謝公伐木招人尤不畏鶴猿謝逋客惟恐雞犬驚鳴騶
姑效興公寄吟想弔奇有願何年酬

沈松樵贈琴泉寺唐經二紙

琴泉寺在潼川府卽唐慧義寺

唐書貴楷則峭急始經生千碑同一法寫經遂孤行晚
出王鱸祥蚤顯鍾紹京東川遺梵夾資福獨無名想見
拾遺來浮圖尙崢嶸象法不自庇劫火俄相搜舍利已
灰滅掇拾得筆精麻紙黃不蠹松墨湛兒睛當時取急
就千萬日有程卧腕驅拂筆波媚出欹傾右餘左不足
荒率得其情宋帖多臆改觀此息喧爭三藏大海濶片
紙一漚輕將毋佛笑儒寶此如連城研金與刺血彼教
何其宏儒徒寫釋典蔽惑良不平我自重我法古今一
蔣衡誰存孔壁簡豈咎秦皇坑

五北將歌

廣州副都統烏蘭泰

桓桓都護鬚髯紫平日愛兵如父子

都統在京爲八旗副都統待兵最有

恩爲謀生計回民屠羊者號羊肉牀慣以重息

刺旗兵公爲設法還債而禁其私借旗兵以紓萬里征

討毒瘴鄉能結士心得士死左江右江賊如麻四方征

調糜蟲沙按礮持燧不敢發一里以外猶哇嗟始將火

鳥在京管火器營以長於火器著稱

老罷據

攻教懦卒可惜利器無開花

險氣山涌水竄孤軍搖不動黑夜出奇卷甲來以少擊

多無旋踵獨恨諸軍不和輯老將兀兀成孤立桂林橋

上鐵雨飛

公中礮重傷旋殞

五管軍民同雨泣嗚呼庸相真無

知何者爲兵法但見萬馬併爲一馬無能當王全不依古來營陣

之法自言吾馬隊不論多少戰時合爲一人一馬連鎮街馮官屯杞縣城金稷村

白蓮池上東捻滅馬山口外西捻奔大沽夷船亦奪氣

咸豐己未王防天津海口擊敗英法兩國兵船蒙城苗練先亡魂大功數十小

戰不知數所到驚呼赤面如天神王面正赤見者驚爲關壯穆誠感

悍鎮化野性陳國瑞善戰而最桀驁服王忠誠奉令唯謹指授良將成高勲

張曜宋慶自從王征討後戰益力名益起殘寇狂走趣戰迫強弩穿縞不自

惜紅旗一隊稱軍鋒先向平原灑戰血紅旗馬隊副都統恒齡最有名

以追賊急盡殲大憝覆鳥巢有名捻首皆殲甘酬素志

歸馬革廿年大帥多如林車後遺棄梁肉廡下堆黃金

阿史社爾行軍無卧具沙陀朱耶報國惟赤心蟻蝨滿
甲幾曾浣芻蕘一束時難尋艱苦廉樸鑒天地家家私
祭同霑襟嗚呼異姓賢王羅青史李郭徐常非其比不
獨戰功近掩策凌超勇王合將忠誠遠追擴廓奇男子

塔爾巴哈台參贊大臣署伊犁將軍錫綸

匈奴象人射郅都楚祭北門爲黔夫敵國所惡我所寶
羊陸市詐將人愚邇來閩外盛材武敢戰內寇怯戰虜
何況羅刹逞睚眦六國同聲畏狼虎一自昆彌叛不朝
王庭十載淪天驕狡黠老漁伺便利盜據甌脫容遁逃
豪傑陷賊能自拔習慣沙場從結髮賢父戰死沙州城

桓靖美諡榮忠骨

父爲古城領隊大
臣殉難諡桓靖

賢兄博學高名起

兄副都統錫綬博雅
能文爲滿洲名士

武達文通一門裏國難家備在西

域孤兒甘赴邊城死絕遠無如塔城孤斗入斯科環雜

胡藩籬外收哈薩克

塔城一帶內哈薩克
屬我外哈薩克屬俄

倚角內結呼

土圖

阿爾泰山喇嘛棍噶扎拉參會賜呼土克圖號號
勇善戰科布多塔爾巴哈台一帶蒙民皆附之有

衆十萬屢與俄邊人戰錫深與結納相爲犄角俄人侵
軼者輒擒治之俄深忌兩人屢言於朝求斥去之遂登

經吏議革職暫緩離將軍任
若讀呼土克圖聽之只有呼土圖三字無克字

清語克爲語助辭

匈奴

未滅家何有閉壁不許通妻孥

妻子自都赴之閉門
不與相見居之他所

荒起疲變重鎮鄂博一步誰能踰西鄰責言衆積毀熱

血未冷霜盈顙玉門望斷敵人喜刀筆糾擿紛紛起私

交不責許田鄭

山東巡撫張曜借洋債六十萬為私用身後事發戶部為奏請籌款償之亦無

譴

責市租獨苛代郡李

戶部劾其借俄商餉五萬前後奏報不符撤銷卹典

恩寬僅

殺節終儀柳髮淒涼歸萬里二卵棄將古有之長城頓
壞今已矣鼓鼙聲壯磬聲悲我皇聽之思者誰屯田未
熟征夫老界上來爭帕爾碑

連珠詩

陸士衡創為演連珠後世多效之庾子山並用韻然駢終不能盡意今以其體為

詩務在辭達而已

朝菌不知晦朔蟪蛄不知春秋知違心多危知近心多
偷微生只須臾苟樂且嬉遊所甘草頭露所便叢棘幽
霜寒卽埽跡潦至亦隨流宇宙固不問謀身且不周賢

惜沒世名聖爲百世謀宣尼日栖皇公旦思綢繆天高
可倚杵海深或斷流陽烏畏仰射六鼈防垂鉤吾聞堯
與舜日爲天下憂

弓調而後求勁馬服而後求良士苟不誠篤雖才終不
祥竇參終負泌蔡京亦叛光相士貴取節非謂根本傷
菀集枯則背飢絜飽且颺其始受操縱其終不可量無
事猶依違緩急終相戕吾聞諸葛公鱗甲屏正方

大厦成而燕雀賀湯沐具而蟣蝨弔小人工依附禍福
不自料憑城作威福視人爲嘖笑婁鯖方逐逐翟羅忽
悄悄幸爲墦間乞敗爲秋穽埽冰山未足恃終遇太陽

照志士貴自立炙手恥媚與吾聞梁伯鸞因熱甘滅竈
天不滿西北地不滿東南人生高厚內何爲無窮貪魚
木難並足齒角不相兼孔門多出妻堯舜無肖男高位
叢憂懼寢兒夜寢酣苟得多惡名外侈內必慙一歲再
結實枯菱已可占此益致彼損得失常相參味此喬松
促悟此瓢飲甘吾聞榮啟期帶索樂有三

善言感人煖於布帛惡言傷人慘於矛戟良象止其輔
咸戒騰其舌一發弦上箭遂成終身隙拂鬚丁銜寇致
仕杜讎白才人取快意洛蜀始決裂儉王肆中傷擲筆
埽名節縱使不悖入亦自累盛德吾聞歐陽子持論常

不竭

琥珀拾芥礖石引針不在同鄉里只在兩同心或因萍
水合亦有千里尋慕羶風無逆佩香谷無深燕昭愛士
誠豈爲多黃金宣聖講洙泗七十士如林跖徒休首山
九千尤森森薰蕕自相感氣類各不侵一賢集眾正一
邪招百壬賢不患無輔士不患終沈吾聞楚瓠巴遊魚
知瑟音

善飲者善醉善騎者善墜隱禍由忽萌高才以矜累必
敗東野車卒窮田巴對得意忌再往上人休自快由基
雀失目滑叔柳生臂極訥該萬辯無爭處常貴防患不

可勝不如味無味吾聞漆園叟取名妨公器

百山學山不至於山百川學海乃至於海安坐終無成
精進效可待十駕駑及騏壹心蟬勝蟹尹需受秋駕夢
魂通真宰呂蒙一武夫三日面目改從來半塗廢皆坐
不知悔望道登天難得道瓦礫在吾聞衛武公好學耄
不懈

佐饗者得嘗佐鬪者得傷附驥行自顯助桀天所亡連
茹保貞吉渙羣終夷傷黨碑磨不滅逆案蓋彌彰文若
抱偉幹徒污孟德賊伯喈感誤恩一浣損芬芳吾聞晉
孫登離塵若鸞鳳

水清者無魚人察者無徒作聖容爲本用晦明之符坐
照有心鏡象罔得元珠隋文好聰察肘腋忘獨孤衛君
辨白馬無救國爲墟王道如春臺亡國如秋荼法煩亂
愈生徒快巧吏胥救過且不給安問宏遠謨吾聞史公
書漢興由破觚

戶樞不蠹流水不腐飀毒生寔安善心出勞苦黃道日
不息何況含生伍輿輦致蹙痿導引成輕舉偷士非可
雕憐農豈得黍玉錯光乃發劍厲芒始吐敵緩兵必鈍
工暇器必楛綿綿存本元新故相吞吐吾聞周公旦無
逸戒聖主

石可破不可以奪堅丹可磨不可以奪赤世事有成敗
本性無改易荀閔蘭漸沲墨歎絲染質秉德旣寡薄磷
緇隨所適豈能計萬全但存生理直憂心雖悄悄不作
鑒與席吾聞劉并州深爲繞指惜

言得其人如聚沙而兩言非其人如聚顰而鼓高論不
啟蒙強諫不悟主點雪須顏氏投水惟漢祖旣遇諱疾
人豈御藥酒苦強教欲覺迷徒受按劍侮知心一言善
戾時三策腐稱佳楸謝妻姑諾孔拒虎躁隱兩不失叩
鳴視所與吾聞漢張猛曉人在一語

越人衣文蛇代馬依北風習俗尙各別禮樂豈苟同聲

教化所始非類神所恫病吟不改烏囚操不移鍾文軌
古自一皮卉今交通胡纓與蕃樂汨亂安所終物曲雖
博取王制乃常宗許孱乘荆車魯殃作楚宮讀書歎微
管適野憂其戎能嚴內外辭方有膺懲功吾聞白太傅
華聲諷樂工

耕當問奴織當問婢兵繫國存亡將繫民生死書生好
大言法吏多吝鄙劉秩陳陶覆吳隱廣州委謾才蹶街
亭琦賢挫好水軍容唐掣肘言路明閩市罷鎮歸郡縣
宋氣不能起能兼文武才翁歸世無幾老馬識徑途老
卒知營壘吾聞漢高皇哀歌思猛士

井蛙不可以語海夏蟲不可以語冰物有知不知人有
能不能尹鐸爲繭絲逾量非所勝齊桓讀糟粕陳言徒
相仍見遠儒乃尊知時國乃興理非一孔盡本非一法
繩小言或破道大受終難憑吾聞李白詩笑道如蒼蠅
三世長者知被服五世長者知飲食世德罕象賢世祿
多惡習神爲形骸勞志以耳目溺謝尙佩香囊何屑議
鮐脂雞鶩爭一飽蜉蝣矜羽翼筋骨旣柔脆物理亦罔
識一旦巢卵覆徒嗟枯魚泣憂樂判生死壽夭視勞逸
吾聞淮南子淡泊以明德

舌以柔而存齒以剛而亡健順貴兼濟禍福豈有常牛

缺撾盜患單豹羅虎戕并弱汲易竭玉堅燒益光精金
能屈伸百煉仍無傷君子有卷舒帝王有弛張南越綏
以柔匈奴克以剛李煜馴而滅仲謀抗而王度德爲進
退相時爲行藏洪範陳皇極極以中爲綱吾聞孫思邈
智行兼圓方

甘爲雞口勿爲牛後匹夫能肆志勝於趙趙走曾聞厲
憐王亦有國含垢專城百里榮伴食媼相醜驚戀困鞭
箠鵠舉快山藪負重陸忍辱內熱顏喪守羊裘帝座客
白衣聖人友至樂貧非病至貴德不朽吾聞陶靖節乞
食羞五斗

引之身之集 卷三 三
天不以人之惡寒而輟其冬地不以人之惡險而輟其
廣剝窮上反下夫決消必長敬慎終不敗心亨利攸往
鳳輝翔千仞虞人徒張網郭爲太學宗朱冠慶元黨匈
匈一時事嶽嶽千載想下流豈可居危行吾所仰吾聞
子輿氏尋直羞尺枉

直木先伐甘井先竭誰是材不材古今未能決良幹爲
榱棟朽木炊爨掇甘泉入嗽咽潢汚流蔑雜榮悴無端
倪偏舉未爲達君看昏亂世蚩氓豈苟活犧有文繡悲
馬有鹽車撻貴賤同一患但勿自戕伐倘無世情嬰賢
愚俱白髮吾聞繫辭傳樂天有真訣

刻鵠不成猶類鶩畫虎不成將類狗苟無將相才不如
先有守孝經致三公下澤稱謹厚快憤能破車代斲必
傷手既有絕臙危轉益效顰醜假王焚漸臺擬經覆醬
瓿斗筭任重器覆餗終貽咎陋儒談大道燕說招擊掊
吾聞漢馮唐爲郎甘白首

薰以香自燒膏以明自銷徒供人世悅坐令天年彫亦
如文章士苦心自抽繅究竟歸幻滅何補人一毫造幽
和已滑極絢精必搖人賞等玩物不賞如風飄老叟薄
虛車揚雄悔刻雕空憐投溷賀復笑秋蟲郊惟有德功
言光景懸雲霄吾聞韓昌黎載道規唐堯

牛涔之水無尺鯉塊阜之山無丈材凡百文學科積理
爲根荄衷聖義乃高廣納言乃恢古今歸一貫雅鄭慎
別裁左氏肇經傳千篇搜帝魁班生擅史法九流綜蘭
臺能漱六藝潤始起八代衰勃如芝菌生浩如江河來
文筆且猶然何況著述才立言王弼謬賣餅公羊哀逃
虛詩喻禪破道文類俳陋乃理之賊碎乃文之灾吾聞
南華經風積必待培

三人成市虎一里能撓椎習非可勝是志士之所悲無
端亦無末徒以戾俗訾蒙深誰能擊復窮凶在迷黠者
詐不汗愚者悍不思飽食百無事但爲哆口箕既有盈

篋謗豈無投杼疑可使童生角能變素爲緇以此理亂
樞供彼談笑資任賢賢必搖舉事事必驟訛言旣莫懲
國事遂阽危不信嗃嗃多救藥無所施吾聞小弁篇君
子舒究之

乞火不如取燧寄汲不如鑿井求已勝仰人勞暫逸乃
永嬰兒在人掌待乳存微幸貧士衣中珠未索自不省
世人志在偷不好精進猛齊景但出涕趙孟惟顧景亦
如士爲學剽竊非修綆謀國計久長豈得飾清淨國與
天地立眾醉須獨醒吾聞周易象自強爲要領

良醫之門多病人驢枯之門多曲木能者用其能老死

猶不足龍蛇堯階傲駟盜孔門育天意主仁閔聖政哀
惇獨羣頑翹一秀意在互相畜苟無巧者勞安有拙者
福十全未爲功一間輒抵觸藏刀莊不仁重趼墨取辱
顯晦當相時因應非逐物吾聞禹與顏同道無覆局
不聰不明不能爲王不癡不聾不能爲公家國雖有別
恩義貴得中正位稱嚴君嘻嘻以吝終蒸藜孟傲慢三
咎禽教恭室有勃谿婦堂有蹲踞翁頽弛啟司農蔽惑
來掇蜂娓娓顏家訓穆穆柳氏風老人更事多深知法
有窮解紛兼教讓養福取抱沖要須兩斟酌家國道自
通防患宜識微矜愚貴苞蒙吾聞子思語聰明乃有容

造父無馬無所見其能羿無矢無所見其巧不患國無
人有賢不知寶有不得其用用不盡其道掣肘作書難
狐搢成功少廉頗棄異邦樂毅不自保信陵徒飲酒屈
原空起草廙卿著書窮荀況作賦老贈策託空言斧柯
傷懷抱吾聞齊扁鵲治疾恨不早

割而舍之鎡鋸不斷肉執而不釋馬蹇截玉人生貴立
志不爭遲與速三年通一經旣冠諸經熟敏者廢於嬉
魯者稱高足生教各十年蘇臺游麋鹿强者亡於驕弱
者大讐復太行無增加愚公有似續吾聞南人言不爲
無恆卜

爲發賜者不必負以緣木爲魚德者不必挈以入淵王道利萬民惟在因自然吏良若慈父不必讀法煩政平若雨澤不必煦沫憐勸桑拔民茶勸農蹊民田清丈奪民時青苗貸民錢水利拂民俗保甲擾民眠不見倉箱溢但聞冠蓋喧冤獄不能察罪人施蒲鞭寇兵不能禦亂後埋傷殘隄防不早築災後施粥餽有司書上考閭里減炊烟雖或勝貪饕實足長巧姦吾聞劉子政去害馬自全

上求材臣殘木上求魚臣乾谷人君思恤民莫如先寡欲穀食與鶉居鎮以無名樸漢文履革烏宋仁惜羊肉

所省能幾何克已爲化俗務觀民廢業貴珍吏貪黷木
鐸何人聽戒石何人讀夜飲國失日求仙巫蠱伏上好
下必甚有如景響速諒哉爲君難不得稍快足無怪石
戶農甘心辭黃屋吾聞唐開元身瘦天下福

螭蛇無足而飛鼯鼠五技而窮士貴知道要不在誇多
通趙武言語訥曹參清靜宗周勃少文采汲黯號愚忠
諸葛尙淡泊魏徵稱田翁鼂桓兩智囊均不保其躬曼
倩最多能屈身滑稽中劉鄩饒百計夾河終無功惟靜
識乃遠惟樸力乃充吾聞柱下史無名道猶龍

謁胡文忠公祠二首

樞軸安危第一功上游大定舉江東目營四海無哇町

手疏羣賢化黨同江漢重瞻周雅盛山林始起楚風雄

長沙定

一作靖

亂誠相似未及高勲又赤忠

武昌縣寒溪有陶桓公祠

公手題其榜曰長沙之勲今存此袁宏東征賦語精金百鍊在割能斷功則治人職思靖亂長沙之勲爲史所

讚侃封長沙郡公公長沙益陽人

二老當年開口笑九原今日百身悲

公與先大夫手札云在軍中得令郎

領解之信與南溪開口而笑者累日南溪乃昌黎韓果靖公名超韓與公皆余受業師也敢云駑鈍

能爲役差幸心源早得師聖慮當勞破吳後雄心不與

渡河時

公聞熱河北狩請自率師入援次年聞定陵上僊病遂篤數日卽薨

安攘未竟

公遺憾傲福英靈儻有知

金山觀東坡玉帶歌

黨人文字毀不留章蔡疾之若仇讐帶跨一園落方外
山僧寶之若天球豈惟僧俗知敬愛壓伏海門百靈怪
會瞻黃繖對延英更抵傳衣鎮法界傳衣傳鉢碎南華
達摩傳六祖衣鉢在韶州南華寺明提學道魏校莊渠椎碎道君玉押埋胡沙可憐

攢宮一片石理宗不保歸真伽世事由來有反覆故主

謫臣殊榮辱南巡聖藻身後榮宣仁社飯當年哭我哀

公遇誦公詩八州徧到拜公祠

眉州嘉州杭州黃州登州定州瓊州廉州皆余

所到一事堪令古人羨今是天海澄清時四大五蘊皆空

相惜公愛公公豈知欲訪中泠桑田改紫金浮玉成陸

海京口十年作戰場緇徒千人無一在此玉不焦亦不
濡龍珠上護白虹采戛眉險巖瞿塘艱不如北固好江
山妙高臺上月明夜應見驂鸞數往還

彭剛直公輓詩

神州貫長江其南際漲海江海幸息浪砥柱今安在持
危望同心事棘公不待回憶越褻昏炎方門戶殆天降
江神尊氣吞海若倍軍離終成睦民恐頓忘餒雪濤擁
虎門兩角高崔嵬孤軍壁其外免胄不披鎧共苦感士
卒任難服寮案虎門曩爲廣州前敵黃浦爲次敵前粵
督以淮軍守黃浦以水師提督率粵軍
守虎門提督怨之以致粵淮交惡公於虎門外沙角大
角二山築礮臺自督湘軍守之粵淮兩軍皆愧服聽指

揮無異詞矣我亦受危任同臭若蘭茝論奏出腐儒謬謂謀

可采凡防海規越計畫兵食及諫阻停戰撤兵諸事余意皆與公合摺奏電奏皆余屬稿聯銜會奏不易

一王師入龍編虜肉不足醢擣虛勢已成行成逞欺給

返旆三軍怯撞斗老夫唉天鑒剛且直懣言宥不罪兩

年栖庵閭擇地斥爽塏霧滌看墜鳶浸淫中肩骭爛爛

紫石棱疏髯蒼纒頰扶掖始下牀英姿終不改九州服

威風所至絕姦賄燦爛婦孺口張皇及瑣猥畫梅徧人

間自吐冰霜蕾北歸未過衡一面至今悔余移湖廣本擬自韶州度

嶺取道衡州由湘入鄂便視公疾後以有奏急難不尸

明過滬商榷之事遂由海道不得過衡州

位此意空千載袍澤入魂夢孤憤結磊砢鯨牙日鋒厲

箕尾失光彩羣蒿豈任柱雨泣問眞宰

憶嶺南草木詩十四首

廣益堂雙松

兩廣節署幕府之堂

南海氣龐厚卉木四時好歲奏壽民婦常有百齡老挺
挺後彫姿不寒孰知寶平生有篤嗜謂勝桃李姣移根
扶胥口礎大枝未繚

廣州少松此自黃浦北岸牛山移來

廣庭闊坦夷不

使雜樹繞龍性生已具森然蓄鱗爪樺柳及楊梅難較
年大小此堂晝沈沈幕僚盛文藻敬事屏戲談攻闕無
枉道增此兩畏友義冠強哉矯坐對穆清風塵牘紛如
掃不憾成器晚自由種不早贊皇念寺竹平安冀長保

歲挺一尺心十年出屋表去粵時松已八尺大率松性每年可長一尺也根深接元氣狂飈難傾倒何必自得蔭神扶竊所禱海國見垂陰吾首猶未皓

此君亭竹

雲龍渴飲海蟠爲歌舞岡大雅化治麗種此夏雪蒼太傅歸紫府教澤在炎方巨海納萬流達者來升堂堂前藹叢綠粉籜拂輕霜滿城皆袒裼十步常清涼諸生月一會束帶各矜莊三老金錫齡張其飴劉昌齡捧手接

容光歲時薦蘋藻如侍先生旁講罷或吟嘯竹間聲琅琅緣山富樓觀此亭心獨臧有斐不可諉我歌淇澳章

越王臺木棉

誰摹宋院畫花色赤如土問名爲木棉發豔獨奇古赫
若朱衣神不比紅裳女五丈阿房旗十圍金輪柱高幹
必掩羣奇葩向天吐鶉火挂屋角珊瑚出海浦疑是丹
穴鳳翔風散毛羽登臺瞰春城光采照萬戶自闕天雲
霞不憂海風雨絮著復丰茸溫氍救貧窶色正兼體直
耐久且高舉糟魄又利用可頌德有五移此貢漢廷玉
樹安足數

三君祠桃榔

海南多直木挺挺擎高穹桃榔尤勁秀旁枝無附庸紺

理外深靚疏節中虛通
枿櫚安敢望自媿衣裳
茸鶴脰據白石鳳尾搖
青空彈指叩冰膚
璚然若絲桐豈等多
刺笏羞伍腐心榕三
賢虞韓蘇皆以直不
容流轉五嶺外百世
爲儒宗靈祠有奇樹
勢若一夔雄疎無爭
巢鳥潔無自賊蟲獨
立江海上庶幾烈士
風

南園老柳

詩人愛古調遊人愛
喬木耿耿抱幽情悽
冷勝穠縹獨憐南濠
上鑿池雙碧玉前後
五先生遊賞寄濠濮
高壘七子抗餘波三
家逐圃廢垣亦頽強
鄰或騎屋我來理荒
穢侵地一朝贖高詠
不可聞餘此老柳禿
何幸免蠹

朽

嶺南蒸淫柳罕有老者

兼得赦樵牧如對耆舊人齒衰風趣足

疏濬發清瑩僵幹吐柔綠晨引翡翠下暮來子鷺浴翼
翼抗風軒後生薦泉菊喜見大雅材文獻有嗣續

杏林莊杏花

退之嶺外歸江陵詫杏花豈知千載後渡海飛明霞移
根曲江上照映炎洲涯潛雷未啟蟄蠟蒂已含葩山榴
與躑躅自羞風韻差婉變漢明妃遠嫁瀚海沙主人閼
絕豔貴希殊矜誇北客喜來看感物皆憶家廣南久無
瘴風物同中華春盤已見薺

土人素不識薺菜余與汪提學柳門訪得之城內官

署民家荒園皆有

秋渴亦得瓜

曩惟潮州有西瓜近年自上海輪船運致甚易

味與京師無異

呶澁均衽席文軫極荒遐徒憐唐宋陋過嶺輒咨嗟

虞苑訶子樹

北海無如管南海無如虞饑鶴翔天表不受曹氏污功
曹忠所事正諫忘其軀天啟椎結秀經師來涵濡荒翳
訶子林姑結流人廬青蠅正一作亦寥落禮堂淪浮屠暴

恣兩鐵塔勒名龔澄樞作主乾隆代海內知尊儒會賓谷爲

粵藩始於寺內兵火殘美蔭艱難存一株棱棱綴秋實作祠祀木主

苦澀不可咀植柵衛槃根不厭清芬孤虞易闡天道參
同得其粗乾坤終不毀碩果終不枯

光孝寺菩提樹

梵書貴不死菩提譯堅固蕭梁千載遙留此青青樹智
藥好事人一枝伴東渡膩葉圓如桃書繪抵絹素尊宿
撫庭柯風旛得妙悟回憶西來初未免異種惡大地風
輪轉从天神噓海霧米囊豔春光劫貝織霜布瞿曇
更何責莊列或同趣如遊九州外隔縣皆親故佛法成
寄生祇園迷印度吾道大而博閤此黎侯寓清曠好塔
院高枝宜愛護一本無此上四句勿碎南華鉢智者急當務

半塘荔支

曲江善賦荔如覩樂天圖簡核盡物狀流涎啟貪夫驛
致何足貴貴及朝露濡久知劉苑荒誰問潘園蕪

南海荔支

灣卽今半塘潘仕成海山仙館一名城西多曲港垂岸
荔香園在半塘港內今廢惟園扁存
千百株丹實飽暑雨綠葉相承扶舟行過其下手接蘋
虯珠但覺天酒香竟忘雪乳腴始知野人芹可獻君庖
廚初涼嘗早稻輕霜擷園蔬懷新皆悅人不在物精粗
豈無糖霜甜不中作酪奴

菊坡精舍朱槿

乾嘉才斯盛人恥不讀書後進棄心得騁鶩各殊塗誰
與端經術通德在番禺洸洸陳先生深入五經郭盡剗
漢宋吟兼握文筆珠日日曳杖來菊坡開精廬晚學不
得見見此一叢朱扶桑生暘谷何年移明都

朱堇堇葉似桑一名

佛桑疑卽扶桑施燄雨中歎絳霞巖陰敷經旬燦不落始知日及誣舜華逞薄媚無怪枯苑殊權花輕紅色叢卉亦何有愛此屋上烏

白雲山玉蘭

安期經世士蜚遞白雲山白雲塞幽谷山半生木蘭斗大盛露囊縹緲不可干陋彼玉盤盂羣芳皆羞顏翻憐絕澗底菖蒲瘦且寒杲日飄風香仙人來驂鸞惟有羅浮蝶凌虛時往還所恨巨棗核不得遺人間吾觀南海物博大非一端覘國卜其強豈止草木蕃願生十丈華浮作太乙船

花塋五梭子

花田以花耕素馨粲如雪臨水土膏香嘉果亦殊別蘇
詩始贊揚范志稍臚列捷業五出花鏤冰沁喉舌色如
青李淺漿並消梨潔老人齒動搖酥脆不勞齧嶺南數
俊味與荔稱雙絕此物饒清涼尤勝荔內熱平生表微
意忍令名湮滅擬作羊桃圖遠爲朝士說

螺岡梅

漲海雪不到臘花紅如春深掩閉香雪別有桃源津一
白被層巘雜樹不亂羣種梅如種桑衣食山中人紅萼
不結實嬌媚奚足珍量谷數珍珠豈以斗斛論但看花

塞戶已指穀滿困縞袂懸圃鶴冰肌藐姑神萬壑吐晴
霧溪井皆芬薰入山心目醉藍舉忘苦辛行人折且興

玉英踏作塵磐石拂題字甘泉

明湛若水

逮張

南山

陳蘭浦

年年花照月定招詩老魂羅浮窮道士枯朽難比倫

羅浮

山中今甚寂寞

此地隱逋客何必西湖濱南海多水鄉番禺多

山村水鄉易致富山村常患貧不信桑園戶樂勝螺岡

民

桑園岡爲南海縣境最大村阮文達鎮粵時爲之大築園隄遂益富饒螺岡司亦番禺縣境大村設營汛

濂溪祠荷

祠在廣雅書院內

嶺外有別傳霽月懸光明

朱子白鹿講會詩青雲白石聊同趣霽月光風更別傳

宋儒較氣象濂溪最寬宏遺愛陽春崖猿鳥護題名講

舍祀畫像學者示鵠正悠然會公意淨植涵波清勤業
策知能息游和性情斲輪喻爲學甘苦持其平報國拙
寡效所志人才成嶺雲自修阻如聞弦誦聲所賴臯比
師切磋殫至誠

梁節庵翰林
朱容生道長

文行具本末博約無詬爭

眼中彬彬彥守道俱研精潮州拔趙德瓊島識姜生前
賢得一士今日羅羣英佩此芳潔意永保君子貞

壽黃漱蘭通政六十

白日當天事主心屢收涓壤補高深貴臣自憚愚忠黯
聖世終容直道禽欹枕浮雲看轉轂揚帆海月望抽簪
後彫獨有貞松在四諫榮名冠翰林

歐陽門下盛生徒說與吾文必道俱豈僅汗流降國士
獨將浩氣厲頑夫從游藍輦春常好問字壺觴德未孤
不藉丹沙紅兩頰逍遙自有養生符

公論昭明息謗傷服公忠實絕他腸閉關韜隱杯如斗
看鏡行藏鬢有霜椎布同心誇主婦絲綸傳世付諸郎
元城老健貧仍樂百鍊難柔鐵漢剛

觚棱回首五雲中待漏聞珂夜每同海有橫流慙報國
風催喬木各成翁坂前負重傷驚馬天外冥飛見遠鴻
人惜投閒吾獨羨小車游洛定從公

俄國太子來遊漢口饗燕晴川閣索詩索書卽席

奉贈

一本云二詩
乃幕客代作

海西飛軟歷重瀛
儲貳祥鍾比德城
日麗晴川開綺席
花明漢水迓霓旌
壯遊雄覽三洲勝
嘉會歡聯兩國情
從此敦槃傳盛事
江天萬里喜澄清

希臘世子

俄太子之戚來
同遊者年甚少

乘興來攀楚畹芳
海天旌旆遠飛揚
偶吟鸚鵡臨春水
同泛蒲桃對夜光
玉樹兩邦聯肺腑
瑤華十部富纁緇
漢南司馬慙衰老
多感停車問七襄

謝周伯晉翰林惠黃州雞毛筆

古人貴硬筆刻畫等錐印
取材穎與鬚剛健生神駿
宜

城傳散卓能使少師困今人矜柔毛因難乃得順墨采
常有餘曼緩藏堅韌新意縛雞翫三錢非鄙吝盤辟尤
如意得自弋陽郡芥羽殺餘怒草翹涵朝潤毫齊力亦
齊馬服忘其迅刷勒無不可爾粟至徑寸細筋白露鋒
豐肌轉成韻萬物無剛柔善役隨所運投筆揩眼花忘
我椎指鈍

謝周伯晉惠上海三白瓜時方苦熱

仙棗曾傳海上瓜今嘗珍蓂玉無瑕清涼已足還思雨
尙有農夫轉水車

謝易實甫餉廬山茶藪

平生最羨

一作慕

樂天廬山草堂記面山腋寺聽飛泉恨

不追隨二林老清齋素榻常周旋樂天謫官避世網始
思棲飲全其天怪君盛年佩青紫胡爲窅然亦樂此築
室奉母廬山陽美哉天下賢公子遠貽山蕒勸我嘗筍
皮薄如春雲香苦茗堪伴晏嬰菜石耳親試伊尹湯山
居一月兩食肉尙有清供非負腹人生枯槁勝憂煎何
必花羔壓紅玉肆志由來抵學道耐寂方爲善擇福我
想名山遊無緣枕上夢見鑑峰煙江南信美戀河北恥
非千里累纒牽終尋王屋太行去暮年一壑吾其專

謝易實甫再惠廬山三峽泉

江城炎燥悶無風忽有甘泉藥病翁徧酌一家俱滿腹
勞人堪傲贊皇公

四海都能納一瓶恍從峽裏濯清冷不如長結宗雷侶
竟日棲賢澗上聽

九月十九日八旗館露臺登高賦呈節齋孝通伯

嚴斗垣叔嶠諸君子

磯上嚴城晚吹涼淩風壯觀補重陽柳仍婀娜秋生色

荷已離披水吐光目極白波迷楚渚

一本作風動夢回

青瑣在江鄉寒烟去雁窮懷抱

用范文正窮塞主詞意

強爲羣賢

一舉觴

臘月十六日邀汪進士陳考功易兵備楊舍人至

兩湖書院講堂看雪月余以畏寒頭痛先歸

大寒結楚澤望雪喜得兩素凌鵲折翼緇泥馬沒掌麥

溝吐微青佃傭券豐穰

湖北土俗麥歸佃客秋收歸田主

農美工商病

役夫尤鞅鞅溼薪束破竈敗疏埋凍壤我憂鐵官職歲

暮敢嬉蕩千夫倚洪鑪邪許久輟響忽撥愁雲繁兼覩

溫暾上瓦作鱗出沒陌有迹來往轉恐睨遽消及茲魄

未長廓然湖上堂冰月交滉漾映廊干步空照臺三成

廣諸生臘早歸閒見短檠晃病夫甚凌競嘉賓皆僞儻

紅頰酒倒餅冰齒齏出盎登樓矚城表皎皎窮萬象嶺

陰尙曳練樹背或披氅殘滴墮鳥巢流澌戛漁榜雖然
犯栗烈自喜攬高朗著帽忍久立惜此夜方養客歸且
勿庸僕病慙共賞平生服董語學行皆勉強強酒祇得
昏強游猶得爽歸來防轉筋灼艾不道枉攜此清淨觀
閉閣藏夢想

封印之明日同節盒伯嚴實甫叔嶠登凌霄閣

印鈴乍寂仍無聞

曾子固詩印鈴
封罷閣門閒

僉判衫袖紛朱殷百

蜡一澤息老物文武張弛如昭鸞黃鵠山閣見百里從
眾豈得辭躋攀梅蕾如椒已得活春意踴躍叢篁間窮
陰急景往必復暄風習習開我顏晶晶惟有萬屋頂紫

青綠素江西山煙暖遠見寶通塔漲動迴薄油湖闕

在關

漢口

洲背露土似浴馬水光抱郭成玦環辣酒燂炙學

旃毳準年許大猶駭頑剪毛胡羊肉磊磊竄草雉子青

斑斑客盡百觚主亦醕登頓未覺吁痛難蕉萃不爲諸

公棄何異蘭杜容榛菅江山雪霽好畫本可惜江生今

南還

歸善江孝通善畫秋間來武昌住一月

今年雪壯極萬里屢足燕代

包南蠻

閩廣皆有雪

隴蜀春漲江漢恐對此悄悄生憂患驛

符火急催鍵石我與郡縣毋官癢

湖北三得大雪微雪無數除日賦詩

瘦人愈饑肥愈飽今年三白猶未了江上千山化白雲

勢欲出川薄天表爽如鳥毳寒生溫眩及牛目昏變曉

池上病鶴獨悽惶苦爲堅冰縮背爪世間坎窞萬里平

眼前荆棘一旦埽楚國土宜兼南北高稷下麥均得寶

協風入律土膏釋且忍五日行泥濘立春已旬餘旣幸漢口

粥場空漢口每年冬輒有沔陽漢川天門潛江諸縣饑民萬數來就食官私粥堂多至十餘所今年漢

沔大熱漢口粥堂至臘月半始復愁南樓燈市少在南樓

設三處皆本地乞丐無外來者城司門口正月賣燈及新年民用兒嬉諸物皆集其下太空落落德怨集安能委

曲慰祈禱褊心獨憂荆襄隄誓殫人力俟天道蟋蟀太

康民已偷衣袂日戒神所保庶矜澤農止流亡差免愚

臣疚癰老歸田未遂思鄉切盼我畿赤蘇枯槁京師畿輔皆得

雪

鼻火難陪射生曹肩寒自對祭詩鳥

梁簡齋翰林方宿衙齋連日屢

有且喜殘年掃塵牘諸蕃懷德守盟好

湖南北兩年來教案四起宜昌

教案尤劇膠擾一年有餘臘月廿八日方奏結城坊鬧鼓斟屠蘇幕府燼燭點

奏草來年六合泥滓無中夜焚香望晴昊

張文襄公詩集卷三百二十六終

安新陳慶虞校